



**BOSNA I HERCEGOVINA
PARLAMENTARNA SKUPŠTINA
BOSNE I HERCEGOVINE
DOM NARODA**

- Komisija za vanjsku i trgovinsku politiku –

Broj: 02/2-011-1423-12/03

Sarajevo, 15. 10. 2003. godine

**Z A P I S N I K
sa 10. sjednice Komisije za vanjsku i trgovinsku politiku
Doma naroda Parlamentarne skupštine BiH
održane 14. 10. 2003. godine**

Desetu sjednicu Komisije za vanjsku i trgovinsku politiku Doma naroda Parlamentarne skupštine Bosne i Hercegovine sazvao je predsjedavajući Komisije Hasan Čengić.

Sjednici su prisustvovali sljedeći članovi Komisije: Hasan Čengić, Anto Spajić, Vinko Radovanović, Osman Brka i Nade Radović, te Nevenka Savić, sekretar Komisije. Opravdano odsutan bio je Velimir Jukić.

Osim pomenutih, sjednici su prisustvovali:

- iz Ministarstva vanjskih poslova BiH: Fuad Šabeta, sekretar ministarstva, Krunoslav Vasilj, pomoćnik ministra i Radmila Bijelić, prvi sekretar;
- iz Direkcije za evropske integracije Osman Topčević, direktor i Maja Križanović, savjetnik;
- iz Predsjedništva BiH: Anto Grbić, savjetnik;
- iz Ureda Vijeća Evrope u Sarajevu: dr Sonja Moser-Starrach, šef Misije i specijalni izaslanik generalnog sekretara Vijeća Evrope i Emina Ganić, savjetnik;
- iz Delegacije Evropske komisije u Sarajevu: Majda Idrizbegović, službenik za ekonomske odnose,
- članovi i zamjenici članova Delegacije Parlamentarne skupštine BiH u Parlamentarnoj skupštini Vijeća Evrope: Martin Raguž, Ljiljana Milićević, Azra Hadžiahmetović, Sead Avdić, Tihomir Gligorić, i Ivo Lozančić.

Sjednicom je predsjedavao predsjedavajući Komisije Hasan Čengić. Nakon što je konstatirao da postoji kvorum, predsjedavajući Komisije je predložio slijedeći

DNEVNI RED

1. Upoznavanje članova Komisije sa stepenom ispunjavanja obaveza koje Bosna i Hercegovina ima prema Vijeću Evrope i napretku u procesu pristupanja Evropskoj uniji;
2. Poziv ambasadoru Savezne Republike Njemačke u Bosni i Hercegovini NJ. E. Arne Freiherr fon Kittlitz und Ottendorf-u za razgovor sa članovima Komisije o unapređenju saradnje između parlamenata naše dvije zemlje i drugim pitanjima iz nadležnosti Komisije;
3. Tekuća pitanja.

Dnevni red je jednoglasno usvojen.

Ad. 1. Upoznavanje članova Komisije sa stepenom ispunjavanja obaveza koje Bosna i Hercegovina ima prema Vijeću Evrope i napretku u procesu pristupanja Evropskoj uniji

Uvodno izlaganje na temu stepena ispunjavanja postprijemnih obaveza prema Vijeću Evrope imao je predstavnik Ministarstva vanjskih poslova Fuad Šabeta. On je iznio osnovne stavove iz Informacije "Vijeće Evrope – pregled ispunjavanja postprijemnih obaveza Bosne i Hercegovine" od 19. 09. 2003. godine, koju je na zahtjev Komisije dostavilo Ministarstvo, kao i aktivnosti i rezultate posjete Monitoring tima Vijeća Evrope obavljene u periodu od 14. – 18. 09. 2003. godine.

G. Šabeta je istakao da su obaveze iz prve godine po prijemu ispunjene, ali da predstoji veliki posao na njihovoj punoj implementaciji. U toku je ispunjavanje obaveza iz druge godine po prijemu. Prioritet u ovom periodu je usklađivanje legislative sa Evropskom konvencijom o ljudskim pravima i usvajanje Socijalne povelje. Izvještaj o posljednjoj posjeti Monitoring tima je u pripremi i biće dostavljan Parlamentarnoj skupštini na uvid.

G-đa Moser-Starrach je govorila o spremnosti Ureda Vijeća Evrope da pomogne domaćim vlastima u problemima sa kojima se susreću pri implementaciji obaveza kao i o prioritnim obavezama u narednom periodu. Tu je posebno pomenula implementaciju Povelje o lokalnoj samoupravi, usvajanje Zakon o slobodi vjere, Evropske socijalne povelje i imenovanje nacionalnog ombudsmena na državnom nivou.

Članovi Delegacije Parlamentarne skupštine BiH u Parlamentarnoj skupštini Vijeća Evrope govorili su o svojim aktivnostima u ovoj međunarodnoj instituciji, kao i o svojoj ulozi i doprinosu ispunjavanju postprijemnih obaveza u zemlji. Opća je ocjena da postoji problem loše koordinacije aktivnosti i sistema odgovornosti na svim nivoima vlasti unutar Bosne i Hercegovine.

Na kraju diskusije, Komisija je jednoglasno usvojila sljedeće zaključke koje će uputiti Kolegiju Doma naroda:

- Komisija izražava zahvalnost Ministarstvu vanjskih poslova na kvalitetnom izvještaju i sveukupnoj saradnji po ovom pitanju;
- Komisija smatra da će neohodni sagovornici na narednoj sjednici koja će se baviti ovom problematikom biti i predstavnici Ministarstva za ljudska prava i izbjeglice i Ministarstva pravde, jer veliki dio obaveza spada pod njihovu nadležnost;
- Ako ova problematika ostane u nadležnosti Komisije za vanjsku i trgovinsku politiku Doma naroda nakon usvajanja novog Poslovnika, za posljednju sedmicu januara treba planirati sjednicu koja će baviti ovom temom, a do tada se očekuje od Ministarstva vanjskih poslova da pripremi dinamički plan aktivnosti ispunjavanja postprijemnih obaveza kako bi prestali razlozi za monitoring BiH i to:
 - (a) za drugu godinu nakon prijema, tj. do aprila 2004. godine i
 - (b) obaveze koje treba izvršiti u toku kalendarske 2004. godine;
- Zatražiti od nadležnih institucija izvještaj o implementaciji amandmana na Ustav koji se odnose na konstitutivnost naroda, do kraja decembra 2003. godine;
- Zatražiti od kolegija oba doma da preduzmu aktivnosti da se svi zakoni koje je nametnuo visoki predstavnik usvoje u Parlamentarnoj skupštini do kraja godine;
- Zatražiti od nadležnih institucija Vijeća ministara da do februara 2004. godine pripreme kompletnu informaciju o aktivnostima i implementaciji mjera za povratak izbjeglica;
- Zatražiti od Vijeća ministara BiH da precizno odredi ko je nadležan za praćenje postprijemnih obaveza prema Vijeću Evrope, odgovorna osoba ili šef radnog tima;
- Zatražiti od Vijeća ministara BiH odgovor na pitanje zašto Ministarstvo za ljudska prava i izbjeglice do sada nije podnijelo I Izvještaj o implementaciji Okvirne konvencije za zaštitu nacionalnih manjina;
- Zatražiti od Vijeća ministara BiH odgovor šta se preduzelo da se nadležnosti Doma za ljudska prava blagovremeno prenesu na Ustavni sud BiH;
- Komisija traži prijedlog prioriternih aktivnosti i obaveza Dom naroda i Parlamentarnu skupštinu BiH u vezi sa ispunjavanjem rokova za postprijemne obaveze BiH prema Vijeću Evrope.

U nastavku 1. tačke Dnevnog reda, koja se odnosila na napredak u procesu pristupanja Evropskoj uniji, uvodno izlaganje imao je direktor Direkcije za evropske

integracije Osman Topčagić. On je rekao da je Direkcija u martu ove godine od Evropske komisije dobila listu od 346 pitanja na koje je trebalo odgovoriti do kraja aprila, što je predstavljalo početak Studije izvodljivosti, tj. test spremnosti domaćih vlasti da, ukoliko rezultat Studije bude pozitivan, pristupe pregovorima o stabilizaciji i pridruživanju. G. Topčagić je istakao da je taj zadatak izvršen u roku, na način da je 25 institucija na državnom nivou i još toliko na entitetskom, odgovorilo na postavljena pitanja iz svoje nadležnosti. Zatim su uslijedile 4 serije razgovora sa predstavnicima Evropske komisije na kojima je konstatovano da su odgovori kvalitetni i sveobuhvatni. Ocjena Studije izvodljivosti koju će dati Evropska komisija očekuje se početkom decembra, s tim da su optimistička očekivanja za početak pregovora o stabilizaciji i pridruživanju druga polovina naredne godine. G. Topčagić je, zatim, govorio o narednim aktivnostima Direkcije: pripremama za pregovaranje sa Evropskom komisijom, problemu prevođenja, ocjeni usaglašenosti našeg zakonodavstva sa evropskim, izradi Strategije evropskih integracija, itd.

U diskusiji nakon izlaganja, članove Komisije su najviše interesirali prioriteti u narednom periodu, koliko ispunjavanje postprijemnih obaveza prema Vijeću Evrope utiče na proces pristupanja Evropskoj uniji, šta će buduće punopravno članstvo značiti za pojedine privredne sektore, itd.

Na kraju su jednoglasno usvojeni sljedeći zaključci:

- Komisija podržava sve aktivnosti Vijeća ministara BiH, odnosno Direkcije za evropske integracije u pravcu približavanja Evropskoj uniji;
- Komisija traži da Vijeće ministara BiH i ostale nadležne institucije redovno izvršavaju obaveze iz Akcionog plana za realizaciju hitnih reformskih mjera 01. 08. 2003. – 01. 03. 2004. godine, a s tim u vezi da Kolegij Doma naroda razmotri zakonodavne aktivnosti iz Akcionog plana koje su u njegovoj nadležnosti i pobrine se za njihovo usvajanje;
- Komisija će zakazati sljedeći sastanak o ovoj temi nakon odgovora Evropske komisije o rezultatima Studije izvodljivosti. Za taj sastanak bi Direkcija za evropske integracije trebala pripremiti dva pisana materijala:
 - (a) Ažurno stanje u procesu pristupanja Evropskoj uniji; i
 - (b) Prijedlog Akcionog plana – dio koji se odnosi na Parlamentarnu skupštinu BiH u vezi očekivanih dodatnih zadataka Bosni i Hercegovini prije početka samih pregovora.

Ad. 2. Poziv ambasadoru Savezne Republike Njemačke u Bosni i Hercegovini NJ. E. Arne Freiherr fon Kittlitz und Ottendorf-u za razgovor sa članovima Komisije o unapređenju saradnje između parlamenata naše dvije zemlje i drugim pitanjima iz nadležnosti Komisije;

Komisija je jednoglasno donijela zaključak da se uputi poziv ambasadoru Savezne Republike Njemačke u Bosni i Hercegovini NJ. E. Arne Freiherr fon Kittlitz und Ottendorf-u da prisustvuje sljedećoj sjednici Komisije.

Ad. 3. Tekuća pitanja

- (a) Na prijedlog člana Komisije Osmana Brke, Komisija je jednoglasno donijela zaključak da se od Zajedničke službe Sekretarijata zatraži da za narednu sjednicu Komisije pripremi informaciju o službenim putovanjima obavljenim u ovom sazivu Parlamentarne skupštine BiH.

Informacija bi trebala da sadrži sljedeće podatke:

- svrha putovanja,
- period i mjesto boravka,
- sastav delegacija ili pojedinačna putovanja (puna imena) i to: članovi Parlamentarne skupštine i zaposleni u Sekretarijatu,
- ko odobrava putovanja.

- (b) Na prijedlog člana Komisije Osmana Brke, Komisija je jednoglasno donijela zaključak da se uputi dopis Kolegiju Doma naroda Parlamentarne skupštine BiH kojim će se zatražiti da provede zaključak Komisije za financijske i administrativne poslove Doma naroda održane 23. 09. 2003. godine, kojim se traži da se u saradnji sa Kolegijem Predstavničkog doma riješi situacija u kojoj sekretari domova i sekretar Zajedničke službe Parlamentarne skupštine BiH obavljaju poslove na koje nisu imenovani, a ni potvrđeni od strane kolegija oba doma.

Predsjedavajući Komisije

Hasan Čengić